

四庫全書

子部

欽定四庫全書

子部

雲笈七籤卷

二十三
二十二

詳校官監察御史臣邱庭謝

檢討臣何思鈞覆勘

總校官麻吉士臣倉聖脈

校對官中書臣王鍾泰

謄錄監生臣崔鶴立

欽定四庫全書

雲笈七籤卷二十

宋 張君房 撰

三洞經教部

太上飛行九神玉經

一名金簡內文

太上大道君告北極真公曰吾昔遊於北天策駕廣寒
足踐華蓋手排九元逸景雲宮遊戲北玄逍遙朔陰之
館賞于洞毫之門盼璇璣以召運促劫會以儻輪歎萬
物之凋衰俯天地而長存乃覺九星之奇妙悟斗魁之

至靈也夫九星者實九天之靈根日月之明梁萬品之淵宗也故天有九氣則以九星為其靈紐地有九州則以九星為其神主人有九孔則以九星為其命府陰陽九宮則以九星為其門戶五嶽四海則以九星為其淵府五九參列網維無窮制御天宿迴轉三辰調理四五致天地得存萬品之所宗神仙之所馮夫天無九星則無以為高清地無九星則無以為至靈人無九星則九孔不明上帝兼之以通真神仙憑之以得成五行乘之

以致度萬物稟之以得生也天清地靜則九星煥明天激
地否則九星翳昏璇璣召劫度之期天關運五行之氣輪
空洞之大幅促九天之應會是以神光轉灼玄監萬生
傍行越位以告災祥天地所以有大運之交百六應符
皆九星緯轉數終所以陰陽字蝕二氣否激天翻地覆
九海冥一金玉化消毫末不失也悉九星之所迴璇璣
之所促明天地之用玄綱之妙得其中則有空常隱步
藏景逃形變化三辰萬物立成黑點隱淪二十五名其

趣幽微秘不下傳上有九辰華君中有九皇夫人魂精
魄靈皆九斗之威神吐煥七曜之光流映九天之門洞朗
幽虛無毫不彰也其星陽芒則為流金火鈴陰芒則為
豁落七元皆高上之靈策元始之威章也能飛尺素之
訣隱緯呂之中列帛華晨之下羊鴈禮天以招真則玄
光曲照于盟塲九晨下降于靈宇夫人懽悅於寢席玄
斗記名於隱書有知此道存之便足以免大劫之會度
洪災於甲申也修之二十七年便得晏鴻翩而騰翔乍

紫霄而升晨也此玉清之上道不比上清之中仙也玉清則上清之高真上清則太清之高神太清則飛仙之高靈凡行玉清之道出則諸天侍軒給玉童玉女各三千人建三七色之節駕紫雲飛輶十二瓊輪前導鳳歌後從玄鈞六師啟路飛龍翼輶其位准高仙列圖玉清行上清之道出則五宿侍衛給玉童玉女各一千五百人建紫毛之節駕飛雲丹輿前吹鳳鸞後奏天鈞玄龍啟道五帝參軒位准上清左右位卿行太清之道出則

五帝侍衛給玉童玉女各八百人建五色之節駕龍輿
飛煙前嘯九鳳後吹八鸞白虬啟道太極參軒故真中
有高卑玄中有階次也玉清之道玄遠絕邈不比中
真及飛仙之徒九星上法玄映之道吾昔受之于元始
於今七億萬劫經天地成敗萬品衰滅而其道獨存今
猶修之於雲景之上而不能忘之於時節者意玩此道
高妙愛樂夫人接遇也況來生始學飛晏之舉而不知
幽尋步空之法何由得披重霄之門觀天地之始終乎

既無此道與九晨乖域夫人絕遊也徒有玄名帝錄超
卓高騰正可得策駕雲龍遊盼五嶽但不死而已如此
望踐斗魁旋步華晨騰景玉清當未有期也子方當匡
御劫運封掌十天科簡玄錄理判神仙宜受此法以綜
萬生今出相付子秘而修焉九晨真人曰行飛步之道
先一日沐浴齋淨是日於中庭布星圖隨斗建也北向
長跪燒香于玄冥星下叩齒三十六通閉眼存歲星在
左脇太白星在右脇熒惑星在頭上辰星在臍下鎮星

在心次覆衣九星先舉左手屈于頭上如斗勢存陽明

星在左手掌中陰精星在左肘上真人星在左乳上玄

冥星當心上

故燒香於玄冥星下而啟事因心而應天明也

丹元星在右臍

上北極星在右膝頭上天闕星在右足趺上輔星在臍下弼星在頭上微祝曰

衣天斗戴金巾乘魁綱入斗門朝真人拜華晨二十八宿覆絡我身乘空步虛飛升自然畢咽氣九過止次舉右手如斗勢臨頭上存陽明星還右手掌中陰精星在右

肘上真人星在右乳上玄冥星當心上丹元星在左臍
上北極星在左膝頭上天關星在左足脰上弼星在左
目上輔星在右目上畢微呪曰

我乘天綱步九元復斗魁行飛仙得天心萬神懽隱形
藏景變化萬端敢有十試收繫斗門掃除不祥正真明
分左煥火鈴右輝靈幡威光萬里嘯命立前主帝所呪
靡不如言畢咽氣十六通止次乘斗旋行斗星之外步
斗魂魄從天樞星上對陽明次登天璇天璣以次周於

隱元往反三過畢於隱元星上歌三洞飛空章而登陽

明也

便立思夫人
形像如左也

第一天樞星則陽明星之魂神也天樞星威而不曜光而不照潛洞太虛圍九百二十里對陽明星之西北門其星則號元斗宮魁精玄上真皇夫人姓明通諱麗玄真名上精頭建飛雲華顏之髻餘髮散至腰衣紫黃青三色之襪帶九鈴之綬口恒吐青氣之光以注於陽明星上以明星之煥也修飛步之道當思夫人姓諱形像

然後呪則魂神澄正明星懽悅天光洞映使魂影俱飛
登晨也并足上天樞星上對陽明星左手撫心右手指
陽明星叩齒九通咽液九過閉氣三息而微呪曰

天妃九星凝氣結真七曜纏絡號曰玉晨上建華蓋下躡
斗魁身乘天璣飛步瓊軒魂精魄靈與形合仙保元日月
天地長存隨運變化夫人齊連上升九天浮景自然畢
閉氣三息次左足躡天璇進右足與左足并通氣

第二天璇星則陰精星之魂神也天璇星景而遠映照

而不煥潛洞太虛圍五百五十里對陰精星之西門其
星則號玄斗宮虛精上玄皇夫人姓玄鏡諱鬱勃光真
名金歸頭建飛雲華頰之髻餘髮散至腰衣飛錦羅
帟鳳文錦帔帶靈飛紫綬口恒吐黑氣之光以注於陰
精星上以明星之暉曜也修飛步之道當思夫人姓諱
形像并足上天璇星上對陰精星左手撫心右手指陰
精星叩齒九通咽液九過閉氣九息而微呪曰

北玄皇靈九上開清玉華潛映緯絡紫庭今日飛步萬

道通明魂魄澄正安附我形無使飛翔同升北星上喻
玄精飲以玉泉變化九微保命天靈畢閉氣三息次進
左足躡天璣星次右足來并通氣

第三天璣星則真人星之魄精也天璣星猛而不顯暉
而不曜潛洞太虛圍七百七十里對真人星之東南門
也其星則號上精宮靈妃元皇夫人姓常明諱化雲真
名流爛頭建晨嬰寶冠衣飛雲明光錦襪帶六出飛晨
之綬口恒吐黃氣之精以注真人星上以明星之曜也

修飛步之道當思夫人姓諱形像并足上天璣星上對真人星右手撫心左手指真人星叩齒九通咽液九過閉氣十二息而微呪曰

靈妃元皇九星中真上理璣度總監諸天下試羣方遊景紫煙是日上吉皇道敷陳潤流九外曲灑我身飛行羽步上入帝晨與皇同眉永享幼年畢閉氣三息次進左足躡天權星進右足與左足并通氣

第四天權星則玄冥星之魄精也天權星微而隱隱而

同映潛煥太虛圓八百里對玄冥星之東門也其星則
號網極宮上虛神妃華皇夫人姓開生諱運明真名嬰
闕頭建七稱之冠衣緋羅鳳文之襪帶金真玉光口恒
吐赤氣之精以注玄冥星上以明星之煥曜也修飛步
之道當思夫人姓諱形像并足上天權星上對玄冥右
手撫心左手指玄冥叩齒九通咽液三過閉氣三息而
微呪曰

神妃上靈號曰華皇安鎮華蓋北上之宮左侍玉女右

衛靈童道引七精九暉之先為我致真飛步天綱使我
魂魄俱升帝堂畢閉氣三息次進左足躡玉衡進右足
與左足并通氣

第五玉衡星則丹元皇之魂靈也玉衡星大而嘿踊而
不煥潛洞太虛圍七百二十里對丹元星東北門也其
星則號紀明宮北上金蓋中皇夫人姓元方諱神武真
名勃頭建紫宸飛華之冠衣九色之襪帶神虎玉文
口恒吐白氣之光以注丹元星上以明星之暉也修飛步

之道當思夫人姓諱形像并足上玉衡星上對丹元星右手撫心左手指丹元叩齒三通咽液三過便閉氣三息而微呪曰

皇華中妃上元所居九斗吐暉精煥八隅流煙鬱勃散靈朱廬使我魄靈天地同符形魂俱升駕空策虛玉光纏絡丹輶紫輿飛行北上參受隱書畢閉氣三息次進左足躡閭陽星進右足與左足並通氣

第六閭陽星則北極星之魂靈也閭陽星朗而潛照暉

而不煥洞微太虛圍七百七十里對北極之下開北洞
之門也其星則號紫極宮安上晨華元皇夫人姓王元
諱根華真名冥會頭建玉晨進賢之冠衣飛青羽襪帶
流金火鈴口恒吐綠氣之精以注北極星上以明星之
曜暉也修飛步之道當思夫人姓諱形像併足上闔陽
星上對北極星而左手撫心右手指北極叩齒三通咽
液五過閉氣五息而微呪曰

九天上帝黃華之宗運轉璇璣總輪八方便我飛步躡

紀天網及覆交并三五縱橫通靈八微羽衣玄黃龍輿
玉景飛行太空長享眉壽天地同功畢閉氣五息次左
足躡搖光星進右足并通氣

第七搖光星則天闕星之魂太明也搖光星則光轉空
洞迴旋天闕潛煥太虛圍九百里上對天闕星之南門
下對北極星也其星則號運天宮玉華靈皇夫人姓度
元諱終會真名啟光頭建飛華顏雲之髻餘髮散至腰
衣七色夜光雲錦之帟九色錦帔九天威靈玉策口恒

吐赤氣之精注天關星上以明星之大光也修飛步之道當思夫人姓諱形像并足上搖光星上對天關星而左手撫心右手指天關叩齒九通咽液九過閉氣三息而微呪曰

天地迴轉七光大明旋輪九氣上應玉清中有夫人號曰華靈玄映九外無毫不生是日良吉飛步紫庭使我魂魄安附身形變化空洞出幽入冥天地同輪萬劫不傾保仙上元九晨齊精畢閉氣七息次左足躡洞明星

進右足并通氣

第八洞明星則輔星之魂精陽明也洞明星則光迴諸
天總輪上宿流暢太虛圍九百九十里上對輔星西南
門也在天關之上梁北極之陽芒也其星則號空真宮
太明常皇夫人姓幽昇諱無韻真名空變頭建飛雲華
顏之髻餘髮散至腰衣飛羅文襦帶九光之綬口恒吐
青氣之精注於輔星之上以常陽大光也修飛步之道
當思夫人姓諱形像并足上洞明星上對輔星而右手

撫心左手指輔星叩齒九通咽液九過閉氣三息而微
呪曰

三五飛行天地開張九元迴網合紐上京天真散靈萬
道益昌夫人曲映是日吉良飛步斗魄旋行玉綱頭戴
華蓋足履常陽遊戲三清變化萬方保仙自然享壽無
窮畢閉氣十二息次左足躡隱元星進右足并通氣

第九隱元星則弼星之魂明空靈也隱元星則隱息華
蓋之下潛光曜于空洞之中圓九百九十里上對弼星

之東南門也其星則號元寶宮空玄變靈上皇夫人姓
冥通諱萬先真名常陽頭建飛雲七稱玉冠衣青文錦
襪帶九光夜燭口恒吐黑氣之精注於弼星之上以明
煥隱洞之光也修飛步之道當思夫人姓諱形像并足
上隱元星上對弼星而左手撫心右手指弼星叩齒十
二通咽液一過閉氣一息而微祝曰

上步天網飛行羽門出入三生逃身隱淪變化形影千
合萬分神安氣鎮鍊度仙竇舉體同飛衣服錦帟流鈴

交落身佩虎文嘯咤五帝策駕景雲上造北辰朝謁皇
君畢閉氣一息止還并足上天樞星上單步往反三周
不須復存思呪說也步斗竟事畢存呪正初登星一過
行之爾往反三過畢還立天樞星上向陽明星而歌誦
徘徊遊行九晨羽章三篇畢便登網上明明星上行飛
步也

羽章

雲網落天紀

九斗翠玉虛

紫蓋重霄嶺

玄精朗八嵎

上有九晨賓

吟詠隱與書

飛步遨北漢

長齡天地居

控轡玄羽臺

飛行九元所

洞虛深幽邃

雲網乘空舉

下有採真士

仰照玉宸府

三周陽明上

九迴入洞野

高步登帝尊

長歌龍飛語

玉霄映北朔

瓊條翠隱柯

空生九靈臺

煥精曜太遐

天闕運重冥

劫會屢經過

乘我羽行駕

飛步織女河

保靈空常化

永忘天地多

此三章出玉清上宮諸九陽玉童九華玉女皆恒歌誦
之於華晨之上以和形寃之交暢啟靈真於幽關也
凡修飛步七元行九星之道無此歌章皆不得妄步天
綱足躡玄斗也犯之九星則執子寃寃閉於斗綱之下
也令人倡狂失性嗔怒妄興不出三年無不喪身非道
不欲使人得仙而人不能閉道淵源耳如此豈可不詳
而行焉九星則九天之根玉清之明精九寃則九星之

明靈人徒知步七星之妙而不知九星竄鬼之至靈也
非七星不欲運人上斗而人身竄神畏斗星之靈鬼不
敢隨人而騰空也欲修飛步之道宜知斗星之竄鬼九
皇夫人內名空常之隱訣也而按圖修行豈當不得飛
登北元上謁華晨者哉但此道高妙玉清寶秘不行中
仙鮮有得者知其法則九星內映夫人降席斗竄感悅
則共攜兆而昇入九元之內宮矣

陽明星天之太尉司政主非上總九天上真中監五嶽

飛仙下領後學真人天地神靈功過輕重莫不隸焉星
圍九百二十里皆瑠璃水精中有玉樹青實金翅之鳥
棲宿其上自生青精玉芝食之一口壽九萬年星有九
門有四光芒皆燭照九億萬里中上有青城玉樓據斗
真人號曰太上宮青城玉樓九宸君姓上雲諱法嬰容
字董洞陽揺天槌頭建九宸玉冠衣青羽飛裳手執斗
中玄圖坐玉樓之中有玄名玉錄當得知九宸君內諱
知者玉晨下映明星玄降修其道飛行太空升入九門

之內也修飛步之道當先於陽明星上右手撫心左手
指天東北閉氣九息叩齒九通咽液三過閉眼思九晨
君姓諱形像留立陽明星上便微祝曰

飛天九晨上據玄魁威振八煥司政紀非今日飛步萬
道通開九真齊景天轉地迴鬼謀截頸人逆斬摧三綱
所捕逆者將衰神靈侍衛享福巍巍得天之心骨化形
飛手攀七綱足踐九扉雲行雨步上昇太微畢左轉陽
明星上九迴立向鬼門閉氣三息轉左足躡陰精進右

足并於陰精星上通氣

陰精星天之上宰主祿位上總天宿下領萬靈及學仙
之人諸學道及兆民俗命祿位莫不隸焉星園五百五
十里亦皆瑠璃水精中有玉樹黑實金翅之所棲自生
玄芝玉飴食之一口得壽五萬年星有五門門有四光
芒爛照九億萬里中上有五色玉樓攀魁真人號曰中
元宮五色玉樓北上晨君姓育嬰諱玄上瓮字昌陽文
激明光頭建玄精玉冠衣玄羽飛裳手執五色羽節坐

玉樓之中若有玄名朱臺當得知上晨君內諱知者則
北上下映陰精玄降修行其道則飛行太虛昇入五門
之內也修飛步之道當先於陰精星上左手指本命右
手撫心閉氣五息叩齒五通咽液五過閉目思北上晨
君諱字形像留立陰精星上便微呪曰

玄晨北靈五氣上精體隱六紀心藏景星日月俠映三
光飭形今日元吉步綱紫庭上開天戶受福朱靈享祚
無極祿位尊榮萬願交覆所向利貞騰飛華蓋遨翔玉

清上詣北辰九真齊輶畢左轉陰精星上五迴向本命
上立閉氣三通轉左足躡彌星進右足并通氣不得躡
真人星但躡彌星耳

真人星天之司空主神仙上總九天高真中監五嶽靈
仙下領學道之人真仙之流莫不隸焉星圍七百七十
里亦皆瑠璃水精中有玉樹黃實金翅之所棲自生黃
精玉芝食之一口得壽三千萬歲星有十二門門有四
光芒燭照九億萬里中上有黃臺玉樓真人號曰真元

宮中黃臺玉樓主仙華晨君姓歸珙諱妙陰光字通度
元度凝脂頭建飛晨寶冠衣青羽飛裳手執斗中青籙
坐玉樓之中若有玄名方諸當得知華晨君內諱知者
則華晨下映真人玄降修行其道則飛行太空昇入十
二門之內也修飛步之道皆先得躡真人星也當并足
弼星上所謂偃息華蓋者也北老真公曰子欲騰身勿
干真人子欲飛行勿枉天綱子欲神仙當拜華晨行道
當避真人星立弼星之上拜真人朝華晨而求飛空也

弼星也空輔星曰常常者常陽空者隱藏其有諱不得傳於人口可於華晨之下羊鴈禮天裂素盟而傳得此秘諱心存而行之輕泄七祖負考風刀也當於弼星上右手撫心左手指西北閉氣九息叩齒九通咽液九過閉眼思主仙華晨君姓諱形像留立真人星上便微祝曰

太微通真弼輔華晨吐煥九精結氣紫煙飛霞流映光曜十天上理元衡下攜神仙今日飛步請禮真人一求

空行二乞隱身三願上昇北掖四便龍衣羽服錦帔青
帟駕乘八景浮遊九元得十天宿與帝同軒畢左迴弼
星七過向真人閉氣三息轉左足躡玄冥進右足并通
氣

玄冥星天之遊擊主伐逆上總九天鬼神中領北帝三
官下監萬兆伐逆不臣諸以凶勃莫不隸焉星圍八百
里亦皆瑠璃水精中有玉樹赤實金翅之所棲自生丹
芝流瑛食之一口得壽八千萬年星有三門門有四光

芒燭照九億萬里中上有朱臺玉樓出斗真人號曰紐
幽宮中朱臺玉樓玄上飛蓋晨君姓冥樞諱定宣覺字
法明度搖天柱頭建三華寶晨冠衣丹錦飛裳手執命
靈之節坐玉樓之中若有玄名玉格當得飛蓋晨君內
諱知者則飛蓋下映玄冥玄降修行其道則飛行太空
上昇入三門之內也修飛步之道當先於玄冥星上右
手撫心左手指天閉氣九息叩齒三通咽液三過閉眼
思飛蓋君姓諱形像留立玄冥星上便微呪曰

天真行道步景藏形七元煥落九晨齊并手把天衡足
踐飛星左輔火甲右御朱兵威振十天流煥上清先戮
謀議後伐妖精敢有干正斬以刀刑三綱所制莫不伏
聽變化往反適心華庭乘空飛步上造帝靈畢左迴三
轉向天閉氣三息轉左足踐丹元星進右足并通氣
丹元星天之斗君主命錄籍上總九天譜籙中統鬼神
部目下領學真兆民命籍諸天諸地莫不總統星圍七
百二十里亦皆瑠璃水精中有赤樹白寶金翅之所棲

自生金精冶鍊之膏食之一口得壽七萬年星有七門
門有四光芒燭照九億萬里中上有素臺金樓躡紀真
人號曰網神宮中素臺金樓躡紀真人金魁七晨君姓
上開諱冥通光字朱煥元變五道頭建七寶飛天冠衣
白錦飛帟手執青元籙籍坐金樓之中若有玄名崑臺
當得知七晨君內諱知者則七晨下映丹元玄降修行
其道則飛行太空上昇入七門之內也修飛步之道當
先於丹元星上右手撫心左手指天關閉氣七息叩齒

三通咽液三過閉眼思七晨君姓諱形像留立丹元上
便微祝曰

飛行躡紀上步丹元乘魁落宿呼命斗竄削死勒生青
白簡分三合成道年命長延亨利眉壽壽齊生華晨肉飛
骨輕駕景乘雲仙衣羽服流鈴紛紛五色煥耀昇入七
門畢迴星上七轉還向天闕閉氣七息轉左足踐北極
進右足并通氣

北極星天之太常主昇進上總九天真中統五嶽飛仙

下領學者之身凡功勤得道轉輪階級悉總之焉星圍
七百七十里亦皆瑠璃水精中有黑樹白子金翅之所
棲自生玄芝水瑛食之一口壽五萬年星有八門門有
四光芒燭照九億萬里中上有玄臺玉樓步綱真人號
曰紀明宮中玄臺玉樓北晨飛華君姓明靈諱長明化
字淵洞源昌上元頭建飛精華冠衣紫錦飛裳手執九
斗玉策坐玉樓之中若有玄名金臺當得知飛華君內
諱知者則飛華下映北極玄降修行其道則飛行太空

上昇八門之内也修飛步之道當先於北極星上右手
撫心左手指金門閉氣八息叩齒三通咽液三過閉目
思飛華君姓諱形像叩齒立北極上便微呪曰

天行三五中元迴旋飛步華蓋御斗乘晨落紀三命徘徊
遊煙今日元吉上希神仙名書玉簡列字紫篇青襦
羽服丹帔錦裙八景丹輿運我昇軒位為仙卿北上之
君請求所呪靡不如言畢迴星上八轉還向西方閉氣
八過轉左足踐天關進右足并通氣

天關星天之上帝主天地機運如四時長養天地否泰
劫會莫不隸焉星圍九百里亦皆瑠璃水精中有三華
之樹五色之寶金翅之所棲生自然九味芝膏服之一
口身生九色之光得壽九萬年星有一門門有九光芒
總運九天之氣燭照九億萬里中上有九層玉樓乘龍
真人號曰闕會宮九層玉樓總雲九元北蓋晨君姓玄
樞諱轉光字會元終明天徒頭建九元寶冠衣九色錦
裳手執暉神之章坐玉樓之中若有玄名九天帝圖玉

錄當得知北蓋晨君內諱知者則北蓋君下映天關玄
降修行其道飛行太虛昇入一門之內也修飛步之道
當於天關星上左手撫心右手指地戶閉氣一息叩齒
三通咽液三過閉眼思北蓋晨君姓諱形像留立天關
星上便微呪曰

天元運關地紀轉維九靈交度三五相推四七幡宿五
帝徘徊承玄步虛上躡玉璣衣斗履斗流鈴煥威順我
者吉逆我者衰我行天真萬里廓開身騰蒼輶覓昇形

飛長離劫會昇入太微畢迴星上一轉還向地戶閉氣
一息轉左足踐輔星進右足并通氣

輔星天尊玉帝之星也曰常常者常陽主飛仙上總九
天領九地五嶽四瀆神仙之官悉由之焉星圍九百九
十里亦皆瑠璃水精中有青華之樹自有九音之字上
有青鳥三足鳥生自然瑠璃芝瑛食之一口得與玉帝
同真星有八門交通八氣門有四光芒燭照九天之上
中有紫氣玉樓遊行三命真人號曰帝席宮中紫氣玉

樓帝尊九晨君姓精常諱常無瓮字玄解子空正上開延
頭建飛精玉冠衣九色衣手執火鈴坐玉樓之中若有玄
名上清得知帝尊內諱知者則帝尊下映輔星玄降修行
其道飛行太空昇入八門之內也修飛步之道當於輔星
上右手撫心左手指熒惑星閉氣三息叩齒三通咽液三
過閉眼思帝尊姓諱形像留立輔星上便微祝曰

乾坤交覆三命接靈上步天宿飛行九星左把隱書右
執羽經拜謁帝尊受帝之名得越華蓋騰翔紫庭今日

行道萬慶交并受福巍巍永享長生身變毛羽飛昇玉
清畢迴星上三過還向南方閉氣三息轉左足還踐弼
星上進右足并通氣

弼星太帝真星也曰空空者恒空隱也主變化無方星
圍九百九十里亦瑠璃水精中有三華之樹自生九天
玉章上有金口之鳳口銜火鈴中生自然七曜之暉得
食暉一口與太帝同真星有九門交關九天門有四光
芒燭照八極之外無央之中也中有玉臺紫館徘徊三

陽真人號曰上尊宮中玉樓紫館帝真元晨君姓幽空
諱空無先字隱元覺冥陽暉幽寥元頭建飛天玉冠衣
九天龍衣手執帝章坐紫館之中若有玄名九天得知
帝真內諱知者則能隱形藏身修行其道則飛升九門
之內也修飛步之道當於弼星上右手撫心左手指北
辰星閉氣五息叩齒三通咽液七過閉眼思帝真元晨
君姓諱形像却立弼星上便微呪曰

道合三微玄虛舉真出常入空逃形天闕浮翔八極駕

欽定四庫全書

雲笈七籤
卷二十

三十四

景紫煙飛步九天變化億千遨戲北蓋嘯命句陳所求
所願靡不如言長齡天地保年華晨畢迴星上五轉還
向北辰星閉氣七息左轉兩足還并立陽明星上從陽
明星單行禹步周迴九星往反九迴止皆不須復存呪
也畢還弼星上平坐偃息華蓋存九晨覆衣如初法閉
眼思已身在絳雲之內乘天網飛空上升九天之門隨
網轉輪九過畢覺身如落空還坐星圖之上便以手拭
目九過捻兩耳門九過而行周天大呪叩齒九通仰西

北而呪曰

高上九靈皇上華君總仰天宿迴度三辰變化四節五行成仙是日行真普命萬神五嶽四瀆及諸靈山天地水官悉衛我軒太陽激電六陰吐雲猛獸驅除萬精四奔毒龍食鬼平滅邪源謀我者刑于我者煩樂我者壽願我者仙我帶靈策體佩七元流金火鈴煥落我身頭戴華蓋足躡景雲口銜天精手握天關空常變化千合萬分金木水火立成自然飛行禹步徘徊九門出入三

清天地長存畢又叩齒三通咽氣二七過都止九晨之道畢於此也行九晨之道當以正月七月四月十月四孟月同用上旬五九唯一日也平旦二月八月五月十一月四仲月同用中旬十五十九正中三月九月六月十二月四季月同用下旬二十五二十九夜半此一月六日旬適取其一日一月三過行之一年三十六過以應天關轉輪九天之氣三百六十度之數也以其日行道皆九天書名得過陽九百六之運身免洪波大劫之

災九年乃得晏飛綱而上步乘空紀而超足也九晨玄
岡金簡文曰修飛步九晨之道亦當依步天綱之日兼
而行之益求飛天之速玄斗屢鑒也若兼修者當先行
九晨而後行步天綱也此二法呪呪為異原同一法

步天綱

太微帝君昔授皇清洞真君步天綱飛地紀據玄斗攀
星魁接九真乘飛龍遊三命浮二生固三寶出六害隱
六陰入六紀鎮天英守延期存元輔躡大弼用流丹房

上升文昌展轉九道位為九老行之二十年受書為上
清真人凡人望七星為近不知步之甚遠道士苟知天
網之可步而不知鳬鳬不追其身非身之不將鳬鳬也
鳬鳬畏七星之威不敢追身而上行也故三鳬不攝七
鳬蕩散徒以空尸步網而神不我從實徒勞也子欲步
網澄心虛靜不思哀憂不念榮味於是迴行三帀登星
啟祝使鳬鳬二神俱通靈關豁然縱體奄忽自忘盛潔
乃步恒如蹈空一年辟非二年辟兵三年辟死四年地

仙千害萬邪衆莫敢干自此以往福慶無端致神使靈
驂駕飛龍太極賜芝玉帝給童行二七年為上清真人
步法勿橫行干綱也直畫連星之界分曰綱也犯橫天
綱皆伐斷天道大禁也步綱勿躡真人星大忌犯此二
者皆脫巾叩頭謝綱象以布帛為之長九尺廣六尺羅
列星位於帛上以青筆為星丹筆為綱盛之潔箱每欲
施行燒香出之侍書有玉女七人衛星有玉童七人婦
人步綱用絳帛太微帝君教授步天綱之經謹按神真

上法先燒香於行事之所閉氣七迴行斗星之外三匝
始於陰精匝於陽明畢乃通氣始得足躡於七星身上
步於陽明耳於是向陽明星又閉氣而心祝曰陽明大
魁玄極文昌使某鬼鬼俱遊天網祝畢乃左足躡陽明
又進右足躡陰精心祝曰陰精北極太上璇璣使某鬼
鬼俱過神津次左足躡北極心祝曰

北極天元迴適玄辰使某鬼鬼俱至玄關次右足躡天
關進左足前與井乃通息大祝之一閉息不竟綱者可

於丹元星上通息更閉微祝曰

金木水火土五行相推七星煥煥天綱最威輔星鎮盛
弼星却衰九真太上太極太微三府玉帝三尊辟非天
動地轉竈鬼相隨使我飛仙真光徘徊名入金房玉門
乃開乘龍陟空日月同輝遊行上清鳴鈴翠衣左躡流
電右御奔雷地上萬邪伏死敢追惡心視我使爾斬摧
帝命玉女營侍以歸竈真鬼神合形升飛

倒行法

止於天闕倒向北極微祝曰

太上玄辰華蓋紫靈北極玉房藏景化精太微玄臺九
真玉城願某飛仙得行雲庭反步天綱鳬鳬俱生乘龍
華宮得道之英左佩玉璫右腰金鈴虎帶龍裙嘯攝天
兵乘景三素飛登上清祝畢乃閉氣舉左足躡北極右
足躡丹元次舉左足躡玄冥前右足與左足併而向真
人之星通息微祝曰

太極九精上皇高真出登元清入隱元陰育某長某使

某好仙玉臺忽開

闕

堂八門乞某佩書絳龍青裙上佐

紫微後聖之君乘十飛龍玄蓋景靈列名元圖日月同
并祝畢因又閉氣左足躡弼星進右足躡陰精又進左
足躡陽明前右足與左足併乃通息微祝曰

天魁正陽斗運低昂前轉元機後動靈綱制鬼以寧拘
鬼以康鬼鬼與身俱行天堂向見金闕高上太皇右扶
仙母左扶仙公紫翠飛華龍袍虎裳帶真巾玉項生圓
光手把神鈴腰佩金鐺口詠洞真七變妙章先自虛無生

而為王飛行九道據斗攀綱前從太一後從玄朗告某
口訣坐在立亡反行至要位為仙卿五藏自生與天相
迎所願如念所求尅昌萬邪伏害易地隱藏惡我天伐
水滅火喪

反行法

又閉氣右迴斗星之外三匝始于陽明匝于陽明通息
祝曰

高上太真無極至尊反行尋生上步天元使某飛仙得

入紫門 又閉氣左足躡陽明右足躡陰精先前右足
躡玄武左足躡丹元次右足躡北極左足躡天關右足
左足并乃通息祝曰

七變返化順行玉宿六紀輔我三綱合步玉帝左眄高
上右顧輔我乘星騰登玄路乞賜飛仙不死之祚遊

上清乘華三素金青翠裙出入九舍北皇見揖南真見
謝名書仙臺千變萬化得友聖君太平輔佐所願從心
萬事成就有惡我者刀刑火墓順行倒行又行三道都

畢乃又舉兩足俱上陽明星以右手撫心左手指玄冥
星閉氣三息叩齒三七咽液三九名曰據斗微祝曰

陽明太素立辰黃房中有大神左拊上皇右把高真龍
銜翠衣飛錦虎文腰帶玉符首戴蓮冠出無入虛金真
玉光靈尊巍莪號曰陽明足躡朱煙口詠洞章賜某隱
書見教步綱周行三復據斗自忘使某飛仙超虛浮空
名書上清乘玄駕龍意有所之願樂皆從三尊合德寬
鬼內通致給神官玉女玉童有惡某者刑之電風姦謀

斷舌齋之十方祝畢存心中忽然忘身良久而下據斗
之道既畢又兩足俱上陰精星以左手撫心以右手指
真人星閉氣三息叩齒三通咽液三過名曰攀魁入太
微微祝曰

陰精玄素華闕生門中有玉帝北極至尊鳳繡華領龍
翠碧裙腰虎佩鈴扶芝丹冠號曰陰精太上之君授其
隱書使步七元攀魁上升遂遊靈闕外拘七鬼內制三
鬼鬼鍊俗累覓寶胎神覓鬼守身與之俱仙飛行上清

還氣嬰顏所向如心萬欲無難有惡某者刑死三官威攝六天役使羣神攀魁之道既畢乃又兩足俱上彌星併足向真人星四拜畢跪閉氣四息叩齒四通咽液四過名曰接真跪微祝曰

太極九精上元明真正機把衡吐納紫煙金光玉映威照十天攝御三光調陽和陰闕元賦氣改易故新上治中宿玄關之玄金室玉戶北掖四便出駕八景浮遊太元龍錦鳳衣虎翠飛裙絳旌綠帔紫羽七緣腰帶神符

首戴扶冠上棲九虛下翔天淵自號玉皇九天極真哀
某好道授某隱篇躬登弼魁朝拜靈君乞願丹書為生
之緣治天三五飛行八玄五藏自生上品飛仙得翼玉
帝後聖之臣位高大夫乘雲飛輪所願皆合衆邪莫干
有惡我者暴形破門接真之道既畢乃又兩足俱上玄
冥星以右手撫心以左手指丹元星閉氣三息叩齒三
七通咽液三過名曰步斗微祝曰

洞天神光迴隱玄冥氣盈太虛去來無形隱天藏地周

灌無生忽登天綱上步紫庭北視雷房南顧電城眩惑
萬變非復故形恍惚流景觸手立成欲求藏身得我姓
名虛無傲兀九變玄冥坐起六甲謁署六丁賜某隱書
步斗行星仰見上皇披丹巾青手把靈光腰帶玉鈴上
乞飛仙與天俱生名書太微浮化上清下乞變化藏景
錄形萬事如願所向皆平有惡我者戮以神兵太極真
經金根上文曰子登玄冥步斗隱形子欲變化當得我
名迴天動地萬物立成步玄冥時及欲隱時當心存此

名字步斗之道既畢乃又兩足俱上丹元星以左手撫
心以右手指北極星閉氣三息叩齒三通咽液三過名
曰躡紀微祝曰

太上九臺丹元玄紀外管北樞內正天理金闕映外王
庭耀裏中有至尊號曰赤子治在丹元絳房之中翠雲
繡華龍帔虎裳右執皇籙左把魁綱足攝景雲首巾紫
冠右佩流鈴左帶玉璫賜某隱書躡紀遊行上乞飛仙
乘玄駕龍書名丹臺太極玉堂所向所求福祿來迎有

惡某者願為滅亡給侍神官玉女玉童躡紀之道既畢
乃又兩足俱上北極星以右手撫心以左手指天關星
閉氣三息叩齒三通咽液三過名曰步綱微祝曰

玄上太微北極紫蓋下有太真遊翔九外翠華飛裙金
鈴青帶腰佩玉光玄雲奄藹賜某隱書上行七氣登清
戲煙真人合會乞丐飛仙書名丹室所向如願無災無
害有惡我者令彼傷敗步綱之道既畢乃又兩足俱上
天關星以右手撫心左手指天關閉氣三息叩齒三通

咽液三過名曰乘龍微祝曰

太上七極紫微絕辰寶玄金房外有玉門周運九宮調
和天關中有尊神號曰紫皇授某隱書攜某乘龍上遊
九天下飛地元景雲丹輿玄華翠裳腰佩龍策頭巾虎
文包生萬物教訓飛仙脫某死名天地長存乘龍步斗
所向受恩有惡我者風刀火然乘龍之道既畢乃又兩
足俱上輔星閉氣一息叩齒三通咽液一過名曰遊行
三命旋步天英也微呪曰

太極輔星精在紫闕養生育命寶守神竈金房再開奉
見輔君賜某隱書使某遊旋列名聖皇飛仙九天巾金
佩真出入洞門遊行三命既畢乃迴行詣弼星兩足俱
上閉氣一息叩齒三通咽液一過名曰徘徊三陽出入
三生徵祝曰

太虛泥丸紫宮天尊玄空真紐為帝之先在道玉皇在
身泥丸馮感歎生氣貫霄元精入明堂強胎益竈朱山
再開奉近靈元左採日華右掇月根流火萬丈金羅碧

裙腰帶天骨首戴華冠賜某隱書得行天關乞願飛仙
役使萬神萬向皆會福德如山行事時皆北向執隱書
而為之也亦可案文視星不必閣誦而作也春步七星
名曰步三綱夏步七星名曰躡六紀秋步七星名曰行
六害冬步七星名曰登六絕

雲笈七籤卷二十

欽定四庫全書

雲笈七籤卷二十一

宗 張君房 撰

天地部

總叙天

三天正法經曰九天真王與元始天王俱生始氣之先天光未朗鬱積未澄溟滓無涯混沌太虛浩汗流冥七十餘劫玄景始分九氣存焉一氣相去九萬九千九百九十歲清氣高澄濁氣下布九天真王元始天王稟自

然之孕置於九天之號九氣玄凝日月星辰於是而明
便有九真之帝上之三真生於極上清微之天次中三
真生於禹餘之天下有三真生於大赤之天

玉京山經曰玉京山冠於八方諸大羅天列世比地之
樞上中央矣山有七寶城城有七寶宮宮有七寶玄臺其
山自然生七寶之樹一株乃彌覆一天八樹彌覆八方
大羅天矣即太上無極虛皇大道君之所治也

大洞經曰大冥在九天之上蓋謂冥氣極遠絕乎九玄

惟讀大洞玉經者可以交接然後玉帝乘丹霄而啟道
太冥披綠霞而朗煥也元始經云大羅之境無復真宰
惟大梵之氣包羅諸天太空之上有自然五霞其色蒼
黃號曰黃天黃天之上其色青蒼號曰蒼天蒼天之上
其色玄空成青號曰青天故頌曰

三界之上 眇眇大羅 上無色根 雲層莪莪

三界寶籙

諸天靈書經曰飛步入北清者是三界之上四天帝王

北真天也言此四帝上為三清玉京之巔應化接引中
為三界四八御運五氣帝主下降無象通生天人各為
一天璿璣玉衡三十六帝五斗魁主亦象人腦四象合
成故放品經云四天王天在玉清之上九天之巔恒以
八節之日命三界四帝周行天下開度道學建齋之人
也先師疏云北清天者北斗是也又云北斗之下崑崙
上宮故人頭首上象崑崙下愚小解將為是誤此去棄
賢既在崑崙山南望將中斗則為北清未審中斗已北

北方北清別在何處今依度人經說東斗主算西斗記
名北斗落死南斗注生中斗大魁總監衆靈此名一天
五斗魁主即明中斗已北而有北斗也今又按靈書正
經本文經云天尊降此四章並是四天帝王度命妙品
四方正土偏得法音其東方品章經云九氣青天東華
宮中青童大君封以青玉寶函之中印以元始九氣之
章其南方品章經云南方三氣丹天朱陵上宮南極上
元君封以赤玉寶函之中印以太丹三氣之章其西方

品章經云西方七氣素天西華宮中西王母封以白玉
寶函之中印以太素七氣之章其北方品章經云北方
五氣玄天元始北上宮中玉晨大君封以玄玉寶函之
中印以太玄五氣之章即明東方而稱東華南方而稱
南極西方而稱西靈北方而稱北真上即明北真而處
三界之上最上之天四天帝主下通一天四序生化非
是一天五斗之位也今按靈書正經並是三界之上四
天帝王正名正位未稱一天五斗名位今乃獨脫北方

取中為上不審更上北真天也比先所錯上下相承古
今疑惑皆從此起又尋先師所錯本意者言三十二天
上下重疊亦為一天二十八宿卽錯將中斗而攝北位
獨脫北方此方以中為上又中為上亦復是誤言九天
初構上下重疊亦為一天比地九宮言鬱單之天上上
氣上先立於子而處一宮即明一宮亦為四梵最上第
一天也若將人身以等於天頭為崑崙目為日月上下
相合其義正是若以身觀身以天下觀天下不及更上

頭象三界之上四人四天帝主天也又乃不及更上頭
象三清之上玉京之山大羅天地故大洞隱注經云崑
崙山上接九氣以為璇璣之輪在太空之中中斗既在崑
崙山上即大羅天闕亦在玉京山上也生神經云飛仙
翼於瓊闕四宰輔於明輪既在三界中斗之上即大羅
天闕玉京瓊闕亦在玉京山上也又明一天三界應位
上下重疊比地既殊取上為下上下下失科四天帝主闕
而不述東華南極西靈北真境界不論何處別立

前四天

天有九氣上下九宮合中宮位始名三界也三界之內三十二天亦列四方四傍並上下天關九宮何在比地九宮亦無次序故明一天三界有異也河圖五鍊等經說一天二十八宿四七相並以為三界二十二天餘有四星上在中斗亦將三界四七相並傍上列位以為玄圍而安三界二十八天餘上四天上為四人一處故三清圖云將以玄元始三氣以為三境三天又以生神

經九天乃於三天之下各並著三天又以四方三十六
天而取二十七天各於九天之下各並著三天一單三
並以為九天未審九天各生八方上下應會何所分立
故大洞經云玄元始三氣各生八方而為二十四帝九
宮各生八方而為七十二宮即明生神九天無有一單
三並九氣天闕上下不應言三洞生化故立三光三乘
各三故立九帝九氣分化各生三天故為三境三十六
天也若以九天各於三天之下一單三並上下重疊惟

有六重之天天若積陰亦任六重天既積陽即合九重
如何九品二等不同上下九宮其天何在故赤書經云
天有九分之闢轉輪三氣九度明焉故明三元九天九
重是也故道德經云道生一一是元氣一是應化元始
天尊也於此妙一而生三洞故靈寶五符經云三洞以
為天尊三公天也三生九氣九氣以為天尊九卿天也
又此九氣各生三天故立三九二十七位故此二十七
位上為天尊二十七大夫天也欲此二十七位上合九

天三元各有一十二位合為三洞三十六天也此言三清降生三界各於八方以下而生五億五萬五千五百五十五億等比地無極三界各稟三清皆承此象上下重立是其義也今言傍並者別有一義故洞真迴元九道飛行羽經云三清天中而有三萬六千天公卿等品並各有官僚公卿大夫侯伯置署如一更相管統降生三界遍備天人皆稟此氣各稟至道妙一之分三公九卿二十七大夫八十一元士百二十郡千二百縣萬二

千鄉三萬六千亭同稟此氣或單或並以為生神萬象之主也非是九天傍次分列也三界圖書相傳為錯者言三清九氣降為三界一天氣餘九色又雜也言三清九氣各成一天降為三界上稟本氣未經說五色共成故靈寶經云上從大寶初降妙一始生於元元生於玄三生萬物莫不相承也又按九天生神及玄門論等經云始生於混沌為蒼色而成鬱單無量天下生三天上聖三品之位復次混生於洞洞為赤色而成上上禪善

天下生三天中聖三品之位復次洞生於浩浩為青色
而成梵監須延天下生三天下聖三品之位復次元生
於旻旻為綠色而成寂然兜術天下生三天上真三品
之位復次旻生於景景為黃色而成不驕樂天下生三
天中真三品之位復次景生於遯遯為白色而成洞元
化應聲天下生三天下真三品之位復次玄生於融融
為紫色而成靈化梵輔天下生三天上仙三品之位復
次融生於炎炎為碧色而成高虛清明天下生三天中

仙三品之位復次炎生於演演為鳥色而成無想無結
無愛天下生三天下仙三品之位故此九氣九色光明
上為三境三十六天也三境降氣三界方生各於三清
八方已下降生三界五億等天也故九天譜經云上從
梵行太清之天三境九氣降為三界天各一色上稟氣
生未見五色一時混雜也今所錯者亦可知委故諸天
內音經云三十二天皆以五合之氣而成空洞結而成
章者此是五篇真文生成五方通為五行合為五臟混

卷二十一
為二儀四序生化此應五方五合所育也非闕九氣混
為五色今以五色合為雲氣相參盤鬱是其錯也

後四天

舊說四梵名為四民之天今按九天譜經云三界應化
三十二天上從梵行太清天中氣漸流降始生於混混
為蒼色而生二萬二千氣其色蒼氣澄凝而成賈奕天
即明賈奕天是四民最上初天即明四民非是太清四
梵四天王天也今言帝王者統領八方始名帝位不審

太虛無上常融天太釋王隆騰勝天龍變梵度天太極
平育賈奕等天乃是一天北方五氣玄天光同四方比
地各為小八天也故明三界三十二天上下重疊三元
品生亦為一天分別四方各屬四正四九列位及其分
應上下相臨故東方九氣青天上為三界東華天也南
方三氣丹天上為三界南極天也西方七氣素天上為
三界西靈天也北方五氣玄天上為三界北真天也五
符經云昇為五雲化為五氣又按靈寶經云五篇經文

生天立地普植神靈上為三境之玄根標天地以長存
鎮五氣於靈館制劫運於三關即明五篇經文上為三
清之上四天王位中為三界四天帝主應為大清楚行
四天而為四八三十二帝八天生主下為一天二十八
宿三十二帝又為比地各列四方四九列位又為一天
五方淨土故按上清經及玄門論等云三界之上而有
八清天名三清降氣下生三界今按八清天內而有太
清天名重明大清楚行之天而生四民賈奕龍變太釋

常融等四天也故法輪經云超度過三羅八難於是名
滅度如脫胞曠朗覩八清也朗明四梵而處三清之下
四民三界之巔上為八清之天三界劫周二十八天已
上八清四民等八天終無劫壞故名三界八清天也或
云三界之中從此天上自有華光不假日月自然明朗
此是訛言妄為大語各自審明取證即解何者言三清
三界凡聖降差有無不同動寂各異慾界六天六慾見
生次上色界一十八天在下六天捨欲愛色次中六天

漸捨色樂又上六天色心隨淨次上無色由四輕塵色聲香味出於觸體漸捨心識有待都忘昇虛入無出生滅境也言三清上境妙化難思九色寶光不假日月無有晝夜亦無去來信三界之內假合成身者洞真經云天有一氣則五氣生焉五篇真文附合生體兩半相合以為生身以身為宅心為主人以神為本神感應生也故明神託五氣共合為識又明神合陰陽以為魂魄若人六識清淨感生六慧六慾煩濁耽入六塵故此生身

命終之後魂陽歸天魄陰歸地自守魄骨以為尸主生時罪福並以神當神更託生別感諸氣四生六趣應感俱然上天下地清濁有異應化三界並感陰陽既感陰陽寧無日月若是仙家道品自有仙光不假日月神通明朗三界見著色欲染塵二景共滋日月皆有並具晝夜三光齊臨二十八宿璇璣不定宿有時轉天有劫期上下數交百六運會今按靈寶九天生神經云日月星宿陰陽五行人民品物並受生成則明三界皆有日月

也又按玄妙經云於此界外八方世界皆上有羅天重
重別置日月五星二十八宿亦與南天下宛利同無異
也又按玄門論及大洞經云九天真人呼日為濯曜羅
三天真人呼日為圓光蔚太素天中呼日為眇景皇上
清真人呼日為九曜生泰清天中仙人呼日為大明太
極天中呼日為圓明玉賢天中呼日為微玄東華真人
呼日為紫曜明亦名玄珠亦謂始暉亦謂大明亦謂日
名鬱儀亦謂月名結璘亦生人首上為眼目故玉京山

經云俯仰存太上華景秀丹田左顧提鬱儀右盼攜結璘
普明天人皆有眼目三界日月亦同人目也三界圖云
其天中心皆有崑崙山又名須彌山也其山高濶傍障
四方日月繞山互為晝夜日在東方于逮境界日正中
時光及南方浮利境界以為日出日在南方於正中時
耶尼境界以為日出西方日正中時光及北方鬱單以
為日出日在北方於正中時東方境界以為日出者今
雖四序合宿是同冬夏二至晝夜不等日若繞山四方

合傳出沒既異則無山隔今以形象難詰或詳日出處
即有映體東方日中南即漸明南方初出日既映山其
日合如立豎半鏡今泰山上而有日觀遙望日初出在
於地中其狀形如橫出半鏡以望初出非映山也若其
日出之處即是須彌其山不高不能映日即知日出在
地中也故易證云爻也者效也效也者象也象效於天
以為爻象也故日在地下明夷之卦為日處夜陽降陰
昇也日出地上陽昇陰降也故地上有日晉卦是也故

在午後日昃之離不鼓缶而歌陰生陽降也言陰陽璇璣晝夜遞興日直繞山證何律呂日若繞山璇璣須停四方度量何為不等言二月八月晝夜各中餘月長短南北互差故月建在子冬至之分日極於南晝短夜長日出於巽日沒於坤從左行而至於巽歷於夜分西北東方三方天下一十九位分為五更皆處於夜晝以己丙午丁未等以為晝日即明夜統西北東方三方天下皆處於夜惟獨南方以為晝日即明日月非隔山也又

月建在午夏至之分日極於北夜短晝長日出於艮日入於乾從艮左行而歷晝位東南西方一十九位三方天下以為晝日惟獨北方亥壬子癸丑等五辰而處於夜重明日月非隔山也又明夏至之日出沒艮乾東南西方三方天下一時為晝冬至之日出沒巽坤西北東方三方天下一時為夜日既繞山四方互明未審此節日映山不又明夏至之日日出於艮日入於乾其崑崙山合近於子日既遠山不合更遠何故起難為日映山也

其崑崙山向北百千萬里則非東方日正中時南方卯地以為日出也又明月建在子冬至之日日出於巽日沒於坤其崑崙山既是映日即合移就南方在於午分其此土人不是南方即合住在崑崙山北其山既是天心不移即明日月非映山也又明一年四時行焉與日月合宿以定律呂故一月建寅寅與亥合其神徵明者徵召萬物而明月建在卯合宿天魁月建在辰合宿從魁月建在巳合宿傳送月建在午合宿小吉月建在未

合宿勝光月建在申合宿太一月建在酉合宿天光月
建在戌合宿太衝月建在亥合宿功曹月建在子合宿
大吉月建在丑合宿神后十二月建合宿行神璇璣玉
衡以定四序四方七宿日夜互更即明一天律呂同則
南方律呂也普天既同四方同天不合山隔也後宣八
景三光同茲五篇真文二象通應具在玉京流光品中
問宣經理答申應用也或有胡人摩尼珠說皆託一物
百六數期三清八景降氣通生西戎即序全無分曉或

云言此天是屬於地住或云雜報世界故近則不入六
慾之天遠則不在三界二十八天之數次上太皇黃曾
天上人者始名慾界最下天也下愚小解因述便答三
界之內三元通生元各十二共三十六位一天三界上
象俱然四梵八清下通元氣既云地住別號誰天雜報
世界何氣寄立次上璇璣下攝何方下地雜報上屬何
天夫言天者在上巔也在上廣覆謂之天也在下厚載
謂之地也言天上天下上下下咸差一天之中上屬玄樞

一天之上更屬上象此天即是太皇黃曾天中人也言
三界之內五種感生雖同一天善惡兩種所感雜報命
短無上品仙家壽九百萬歲五方淨土皆定壽年洞室
虛宮上下不等誠仙基暫翫柯爛樵人或二日逢仙則
經二百餘歲諸仙人壽具顯後章惟此下地淨穢兩別
遠明三清升降元氣下生三界法象降成真仙聖位各
備修科雖居三界仙道原深故消魔經云三清上境三
十六天下備三界三十六帝其三界劫盡被劫火所燒

其三洞仙家不覺有火也故明雜報世界善惡同天善者福壽遐年惡者濁辱短促淨穢二土咸備一天博地下方亦有上道先標前錯一十二條審而觀詳他義總晚請詳圖錄入道機要次後顯章具明前疑

四梵三界三十二天

太上曰第一慾界六天一曰太皇黃曾天二曰大明玉完天三曰清明何童天四曰玄胎平育天五曰元明文舉天六曰七曜摩夷天

右慾界六天有色有慾交接陰陽人民胎生是故舉其重因名為慾界

第二色界一十八天七曰虛無越衡天八曰太極濛翳天九曰赤明和陽天十曰玄明恭華天十一曰曜明宗飄天十二曰竺落皇笏天十三曰虛明堂曜天十四曰觀明端靜天十五曰玄明恭慶天十六曰太煥極瑤天十七曰元載孔昇天十八曰太安皇崖天十九曰顯定極風天二十曰始黃孝芒天二十一曰太黃翁重天二

十二曰無思江由天二十三曰上揲沅樂天二十四曰
無極曇誓天

右色界十八天云其界有色無情慾不交陰陽人民
化生但噉香無復便止之患故曰色界

第三無色界四天二十五曰皓庭霄度天二十六曰淵
通元洞天二十七曰翰寵妙成天二十八曰秀樂禁上
天

右無色界四天云無復色慾其界人微妙無色想乃

有形長數百里而人不自覺惟有真人能見故曰無色界

闕

梵天元始曰二十九曰常融天三十曰玉降天三十一曰梵度天三十二曰賈奕天

四天之上則為梵行梵行之上則是上清之天玉京玄都紫微宮也乃太上道君所治真人所登也自四天之下二十八天分為三界一天則有一帝王治其中其天人皆是在世受持智慧上品之人從善功所得自然衣

食飛行來去逍遙歡樂但死生之限不斷猶有壽命自有長短下第一人壽九萬歲以次轉治之

雲笈七籤卷二十一

欽定四庫全書

雲笈七籤卷二十二

宋 張君房 撰

天地部

總說天地五方

外國放品隱元內文經云天地五方皆有制御剛柔之色使不得落其地深二十億萬里得潤澤潤澤下二十億萬里得金粟澤金粟澤下二十億萬里得金剛鐵澤金剛鐵澤下二十億萬里得水澤水澤下八十億萬里

得大風澤大風澤下五百二十億萬里乃網維天地制
使不陷如今日月星辰為風所待也學者不知地下之
境潤色深淺即五帝不過兆身於外國之境也

東方弗于岱九萬里之外極豪林之墟其國音銘呵羅
提之國國地形正員土色如碧脂之鮮無有山阜廣狹
九十萬里其國人形長二丈壽四百歲國有六音之銘
是高上始氣置於外國胡老之品高上恒吟歌其音以
化胡老之人令知外國有不死之教其國人皆行禮而

誦其音是得四百歲之壽無有中天之命上學之士知
外國地色恒吟詠六品之音者則致胡老仙官衛兆之
身九年自然得遊呵羅提之國與胡老交言變化飛空
遊行東極之境也

南方閩浮利三十萬里之外極洞陽之野其國音則銘
伊沙陀之國國地平博無有高下土色如丹廣狹八十
一萬里其國人形長二丈四尺壽三百六十歲國有六
音之銘是高上置於外國越老之品高上恒吟歌其音

以化越老之人令知其國有不死之教其國人皆行禮而誦其音是得三百六十歲之壽無有中天之命學者知外國地色恒吟詠六品之音者則致越老仙官衛兆之身九年自然得遊伊沙陁之國與越老交言變化朱宮飛行南陽之境也

西方俱耶尼七十萬里之外極浩素之壘其國音則銘尼維羅綠那之國國地形多高壘與天西關相接土色白如玉廣狹六十八萬里其國人形長一丈六尺壽六百

歲國有六音之銘是高上置於外國氏老之品高上恒吟歌其音以化氏老之人令知其國有不死之教其國人皆行禮誦詠其音是得六百歲之壽無有中天之命學者知外國地色恒吟詠修行則致氏老仙官衛兆之身九年自然得遊尼維羅綠那之國與氏老仙官交言能飛行玄虛遊戲浩素之壟也

北方鬱單五十萬里之外國極朔陰之庭其國音則銘旬他羅之國國地長流平演土色黑潤廣狹五十八萬

里其國人形長一丈二尺壽三百歲國有六音之銘是
高上置於外國羗老之品高上恒吟歌其音以化羗老
之人令知其國有不死之教其國人皆行禮而誦詠其
音是得三百歲之壽無有中天之命學者知外國地色
恒吟詠修行則致羗老仙官衛兆之身九年自然得遊
旬他羅之國與羗老交言飛行玄虛遊宴朔陰之庭也
上方九天之上清陽虛空之內無色無象無形無影空
洞之銘元精青沌自然之國以青氣為世界上極無窮

四覆諸天則高上玉皇萬聖帝真受生之根元壽命無
量惟劫為年其空洞之內亦有六音之銘則元始置於
真皇自然之品高上吟歌其音以延羣仙令知玄空有
無量之真其國玉皇萬聖帝真皆行禮悉吟詠其音是
得無量之壽學者知空洞之色吟詠修行則致三元下
降五帝詣房授兆靈音九年則得乘駕浮雲上造玉清
太空之中也

中國直下極大風澤去地五百二十億萬里網維地源

制使不落土色如金之精中國音則銘太和寶真無量
之國中嶽崑崙即據其中央諸天之別名上有玄圃七
寶珠宮與天交端上真飛仙之館中國周廻百二十億
萬里其國人形長九尺皆學導引之術壽一千二百歲
國有六音之銘是髙上置於中國之品髙上玉皇帝君
悉吟詠其音以化中國僖老之人令知其國有不死之
教其國人皆修上清之道行禮誦詠是得壽一千二百
歲無有橫天之年學者知中國地色吟詠修行則僖老

仙官衛兆之身九年自然與僖老交言玄察太空飛行
上清

九地三十六音

諸天內銘九地三十六音以元始同存空靈建號結自
然之名表於九玄演流外國三十六音如是天地各有
三十六分天則有三十六天王以應三十六國地則有
三十六土皇以應三十六天天王典真土皇主仙為學
不知天之內音則天王不領兆名不知地下之音土皇

則不滅兆跡閉不得仙有見其文受其訣音天王玄鑒
七聖刺篇西龜定錄東華書名土皇滅尸落跡九陰保
舉上清五靈敬護十界扶迎周流六國平滅羣凶五兵
摧伏天魔束形九年秉空飛行上清真道高妙不得妄
宣輕泄寶音七祖充責已身殞亡三塗五苦萬劫不原
上真之士慎科而行

朝禮訣法

諸天王恒以八節及月朔之日遊觀無崖歷戲雲房逍

遙玉清流眇十方於明霞之上恒詠諸天內音飛玄之
章上慶天真內懽神衿玉響虛朗瓊韻合音當此之日
五老浮位九帝臨軒四司鑒試五帝衛靈衆真齊唱萬
仙禮音三光停暉七元煥明山海靜波諸天肅清八素
散華四皇拂塵靈風揚香綠霞吐津天元溟滓玉虛含
欣朗朗高深之館渺渺太漠之中洞虛入微周覽無窮
有得其道與帝結朋勤誦其章位准仙王德同諸天壽

齊三光

凡學上仙之道志登玉清奉禮帝尊而不知三十六天之音飛玄之章則三十六天王不領北名徒為精勤天不降真四司不敬五帝不迎天魔侵真終不成仙欲飛行玄虛遊晏五嶽而不知九地三十六土皇內名則九陰不落兆尸九地不滅兆跡徒勞幽山望飛反沈欲行此道每至八節月朔日沐浴清齋入室燒香朝禮諸天北向叩齒三十六通微祝曰兆臣甲乙志慕神仙八慶之日朝禮天尊上願騰景乘空落煙飛超玉清洞遊諸

天中願變形致五神昇入月門仰啜八騫石景水母玉
胞飛根長披朱日與光同存下願四極授我口言西華
侍衛役使金晨攜提五老八景同軒上慶交合五願開
陳得如所願體合自然真靈下降賜登上仙畢便六拜
仰咽六氣次西向六拜咽六氣次南向六拜咽六氣次
東向六拜咽六氣次西北六拜咽六氣次東南六拜咽
六氣合六方三十六拜朝三十六天畢還北向平坐詠
三十六天飛玄之章一遍竟又六拜六咽氣都止也此

高上朝三十六天上法行之九年天降雲輿三光詣房
書名玉清刻簡青宮四司右列十界敬迎乘空飛行上
昇玉晨其法高妙不得妄宣輕泄寶文七祖充責身役
鬼官長閑三徒萬劫不原

高上九玄三十六天內音

第一無上元景無色鬱單無量天英勃天王姓混諱靄
靄羅

第二無形清微天化昇天王姓馮諱提
阿沙

第三無精波羅禰天玄黑天王姓雲諱奎
零

第四入色水無量億羅天飛宗天王姓王

諱阿衛

第五無極洞清上上禪善無量壽天雲羅天王姓禪

諱

霜 霸

第六玄微自然上虛禹餘天梵咽天王姓羅

諱彼梨荼

第七玄清上無那首約諍天玄那天王姓梵

諱摩首波

第八梵行上清氣稽那邊淨天云攜天王姓騫

諱首苛

第九無窮洞虛極上須延天迴摩天王姓澤

諱震霸羅

第十玄梵玉虛無精氣羅迦淨月天雲阿天王姓周

諱阿

須迦

第十一氣玄元達上靈赤天重慕天王姓丹

諱清淨瑛

第十二大梵玄無氣離起行如天世畢天王姓周

諱分若

第十三無極上靈玉虛玄洞寂然天家玉天王姓津

諱霽

虞

第十四寶梵無色上真氣潘羅玄妙天雲持天王姓隨

諱黎

沐音

第十五飛梵行真上玄答謾福德天部利天王姓王

諱惟

離鉞

第十六雲梵流精中元近慈際淳天世良天王姓朱

諱梨

謁

第十七玄上洞極無崖不驕樂天流芬天王姓凝

諱霍霽

第十八大梵玄青元精答昶近際天元深天王姓阿

諱明

秀

第十九行梵紫虛上元首帶快見天洞干天王姓劉

諱且

房

第二十虛梵上清化靈須陀結愛天飛衣天王姓彭

諱移

那

第二十一上極無景洞微化應聲天玉攜天王姓輝

諱靈

處

第二十二大梵九玄中元氣阿那給道德天葵天王姓

捷

諱尼始

第二十三行梵元清下靈氣須達天總幾天王姓周

諱難

首

第二十四極梵洞微九靈氣須帶阿那天九曲天王姓

竺
諱明和

第二十五無名至極洞微梵寶天

闕二字

天王姓精

諱霧

雲
釋

第二十六微梵玄天氣帶扇給道德天

闕二字

天王姓洛

諱須
阿摩

第二十七虛梵天氣蟬然識慧天

闕二字

天王姓云

諱元

施

第二十八空梵中天續元伊檀天

闕二

天王姓朱

諱仲

生

第二十九太極無崖紫虛洞幽梵迦摩夷天世羅天王

姓云

諱震

第三十綠梵自然識慧入天雲九天王姓迦

諱釋文羅

第三十一玄梵大行無景無所念慧天宗提天王姓伊

諱檀

阿

第三十二天雲梵上行維先阿檀天正羣天王姓仲

諱雲

勃 勳

第三十三無色玄清洞微波梨答瑟天闕二天王姓王

諱靈
霜

第三十四洞微玄上梵氣阿竭含那天闕二天王姓桓

諱墮
世宗

第三十五玄上綠梵滅然天闕二天王姓朱諱陀雲彌

第三十六極色上行梵泥維先若那天闕二天王姓袁

諱員
珠

三十六天內名生於空洞元氣之先文華表見題於崑崙之山高上音其玉文上相集其妙篇稟受太空自然之章上標玄圖中統六國三十六音下總九地三十六土皇靈篇洞暢玉慧虛鮮皆天王之遊歌空玄之寶章六六韻合四四齊真九帝分號三十六天萬氣總隸普願羣仙上極無崖無色下極洞源洞淵諸為上真飛仙不稟玉音則不得遊觀無崖之天有得其文天王書名刻字紫札結錄玉晨三十六年尅得上登無色之天下

洞九地之源上妙之道不傳下仙輕泄寶音七祖充責
身負刀山三徒五苦萬劫不原

洞淵九地三十六音內銘

第一壘色潤地正音土皇姓泰

諱孝景椿

第一壘色潤地行音土皇姓黃

諱昌上文

第一壘色潤地遊音土皇姓青

諱玄文基

第一壘色潤地梵音土皇姓蜚

諱忠陳星

第二壘剛色地正音土皇姓戊

諱坤文光

第二壘剛色地行音土皇姓鬱

諱黃母生

第二壘剛色地遊音土皇姓玄

諱乾德維

第二壘剛色地梵音土皇姓長

諱皇萌

第三壘石脂色澤地正音土皇姓張

諱維神保

第三壘石脂色澤地行音土皇姓周

諱伯上仁

第三壘石脂色澤地遊音土皇姓朱

諱明車子

第三壘石脂色澤地梵音土皇姓庚

諱文敬士

第四壘潤澤地正音土皇姓賈

諱雲子高

第四壘潤澤地行音土皇姓謝

諱伯元

第四壘潤澤地遊音土皇姓已

諱大秦

第四壘潤澤地梵音土皇姓行

諱機正

第五壘金粟澤地正音土皇姓華

諱明延

第五壘金粟澤地行音土皇姓黃

諱齡我

第五壘金粟澤地遊音土皇姓雲

諱探无

第五壘金粟澤地梵音土皇姓蔣

諱通光

第六壘金剛鐵澤地正音土皇姓李

諱上少

第六壘金剛鐵澤地行音土皇姓范

諱來力安

第六壘金剛鐵澤地遊音土皇姓長

諱李季元

第六壘金剛鐵澤地梵音土皇姓王

諱女容

第七壘水制澤地正音土皇姓唐

諱初生映

第七壘水制澤地行音土皇姓吳

諱正法圖

第七壘水制澤地遊音土皇姓漢

諱高文徹

第七壘水制澤地梵音土皇姓京

諱仲龍首

第八壘大風澤地正音土皇姓葛

諱玄昇先

第八壘大風澤地行音土皇姓華

諱茂雲長

第八壘大風澤地遊音土皇姓羊

諱真洞玄

第八壘大風澤地梵音土皇姓周

諱尚敬原

第九壘洞淵無色剛維地氣正音土皇姓極

諱无上玄

第九壘洞淵無色剛維地氣行音土皇姓昇

諱虛元浩

第九壘洞淵無色剛維地氣遊音土皇姓趙

諱上伯玄

第九壘洞淵無色剛維地氣梵音土皇姓農

諱勤元伯

右九壘之地極下洞淵洞源綱維天地制使不落上

則去第一壘五百二十億萬里下則無窮無境無邊
無際皆網維之氣如是第九壘土皇以三月一日六
月二日九月三日十二月四日一年四過乘五色雲
輿九色飛龍執中元命神之章從僖老仙官耀天羽
騎萬二千人上詣波梨答起天奏九地學道得仙人
名言於四天之主

凡學上法當以其日日入時入室向太歲黃書白紙上
四土皇內音服之叩齒十二通仰存四土皇姓諱悉著

玄黃五色之衣頭戴九元通天寶冠足著五色師子交
交之履執文身保命之符乘黃霞飛輿從五帝玉女三
十六人飛行上昇波梨答愁天便咒曰

二象迴周九精洞靈皇老應符騰虛入清四通八達飛
霞紫瓊上登金華奉對帝靈記仙元錄青宮刻名得道
白簡封字七靈九壘滅尸東井鍊形三九降真我道已
明得乘飛景上登玉庭畢心拜九拜咽氣十二通止行
之三十六年得乘黃霞飛輿上昇波梨答愁之天九地

九壘直下九重合三十六音三十六土皇上應三十六
天中應三十六國如是土皇皆位齊玉皇之號但分氣
各治上下之別名耳土皇三十六年轉號上清之宮襲
三十六天之王玉司之官於九壘之下皆舉學道得仙
之名上奏九天天王為學不知九壘地音三十六土皇
內諱九地不滅兆跡九天丞相不受兆名五嶽不降雲
輿五帝不衛兆身徒明外國之音故不得匡會而昇也
故天地人各稟三三之氣三合成真然後得仙也

凡知九地之音三十六土皇內諱則九氣丈人恒以四方五色靈官防衛兆身出入遊行登陟五嶽則仙官侍送滅魔威試降致羣真九年飛空坐在立亡三十六年上昇太清居世得有此文七玄九祖則為九氣命靈上皇司官奉衛形骸撫慰靈魂蒿里父老丘丞相掾皆為驅除無復拘閉謫役之患居則在地保安無凶十二守將營扞八門通真致神欲富則富欲官則官欲仙則仙欲神則神此道祕妙非可言宣上相青童稟受高上口

訣寶篇妄泄靈文七祖充役萬劫不原

登山住止安居審地吉凶法

若欲登山住止及安居宅審地吉凶當以戊己之日黃書九地三十六音文白紙上置所居中央以盆覆之三宿開看若有黃色潤紙大吉若有青色則下有死靈之尸若有白色則凶若有赤色者則驚恐若有黑色者則主財寶若有紫色者得神仙都不異則止可三年安過此必折傷

東方呵羅提國

第一品銘

正音無夷

第二品銘

正音波泥

第三品銘

正音久難

第四品銘

正音吉羅

第五品銘

正音无思

第六品銘

正音雲芝

東方去中國九十萬里外名為呵羅提之國一名日生

國國外有扶桑在碧海之中地一面方萬里上有大帝宮太真王之別治其上生林如桑皆數千丈大者三千圍兩兩同根而生有實赤如桑椹仙人所啖食體作金光色其實皆九千歲一生又有生洲在扶桑外西接蓬萊地面方二千五百里去岸二十三萬里上有仙家數萬人地無寒暑時節溫和多生神仙芝草食之飛空而行扶桑東又有祖洲在東海之中地方五百里去岸七萬里上有不死芝草形狀似菰苗長三四尺一名養神

芝其葉似菰生不叢株食之飛行上清已歿之人覆之
則生神奇妙藥入其國宜知其名存胡老仙官採之於
祖洲思其色而服之三年面有流光延壽萬年符合自
然有仙人齎此神物獻送於身也

南方伊沙陀國

第一品銘
正音盈華

第二品銘
正音王家

第三品銘
正音握魔

第四品銘

正音耀範

第五品銘

正音武都

第六品銘

正音飛蒲

南方去中國八萬一千里外名閩浮黎之外極洞陽之
野國名伊沙陀之國一名火庭天竺之國國外有長洲
一名青丘在南海辰巳地方五千里去四方之岸二十
萬里則生天樹長三千丈大者二千圍甚多靈藥甘液
玉英無所不有其上有民人皆壽三百六十歲又有靈

狐之獸大者如犬色如金叫聲響四千里威制虎豹萬禽得衣其毛壽同天地青丘左則有風山山恒震聲上有紫府宮天真神仙玉女所遊觀又有炎洲在南海中央地方二千里去岸九萬里上有風生獸似豹青色大如狸積火連天燒之經月不死毛亦不然斫刺不入以鐵鎚交鍛其頭數千下乃死張口向風須臾復活以石上菖蒲塞其鼻即死取其腦和菊花服之壽同天地又有火林山山中有火光獸大如鼠毛長三四寸或赤或白於

是夜半望山上林木及此獸光照如然火取其獸毛作布名之火浣布小汙以火燒之即鮮白則伊沙陁國人所衣得此毛仙人降形學者存其國之音思越老仙官三十六年神人當以此獸及本國神奇之物獻送於北也

西方尼維羅綠那國

第一品銘 音曰華蓮

第二品銘 音曰高軒

第三品銘 音曰明身

第四品銘 音曰土纏

第五品銘 音曰星震

第六品銘 音曰朱天

西方去中國六萬里外名俱耶尼之外極皓素之龍壑寒
穴之野則尼維羅綠那之國一名雲胡月支國國人壽
六百歲國外則有流洲在西海之南地方三千里去東
岸十九萬里其上有仙家數萬上有山生昆吾之石治

石成鐵作劍光明照洞如水精割玉如土鳳麟洲在海
中央地方一千五百里四面有弱水鴻毛所不浮上有
仙家數千鳳麟為羣上有吉光之獸如狸能作北語聲
如梵音與其國人通言獸毛生光奕奕悉仙人所衣得
衣其毛壽同天地學者存其國音氏老仙官三十六年
當獻送昆吾之劍吉光之獸於兆也

北方旬他羅國

第一品銘 音曰玄家

第二品銘 音曰文多

第三品銘 音曰山蘆

第四品銘 音曰武都

第五品銘 音曰盈家

第六品銘 音曰玄摩

北方去中國五萬里外名鬱單極朔陰鈞陳之庭國名
旬他羅之國一名天鏡之國國人壽三百歲國外則有
玄洲方七千二百里四面是海去岸三十六萬里上有

太玄都仙伯真公所治有鸞鷟之鳥如浮氣闕丘山名

為風山與天西北門連界金堂玉室宮府闕金玉紫芝

是三天所治其外則有元洲地方三千里去南岸十萬里上生五芝玄澗澗水如蜜飲之與天地同年中有三萬仙家悉飲此水得仙不死學者存其國音羌老仙官三十六年降獻玄澗五芝水也

上方元精青沌自然國

第一品銘 正音重權

第二品銘 正音玉金

第三品銘 正音三林

第四品銘 正音正精

第五品銘 正音吸鈴

第六品銘 正音綠嬰

上方九天之上清陽恢空之內無色無象無形無影空
洞之銘元精青沌自然之國一名洞渙清衍之國以青
氣為世界上極無窮四覆諸天惟有玉虛紫館結空洞

之煙而虛玄青沌之內也為學存高上之音則天人授
子飛仙之方

中央太和寶真無量國

第一品銘 正音山蘆

第二品銘 正音世家

第三品銘 正音嵯峨

第四品銘 正音盈華


第五品銘 正音翟葩

第六品銘 正音羅那

中國四周百二十億萬里下極大風澤五百二十億萬里崑崙處其中央弱水周帀繞山山高平地三萬六千里上三角面方長萬里形似偃盆中央小狹上廣其一角正北千辰星之精名曰閼風臺一角正西名曰玄圃臺其一角正東名曰崑崙宮一處有積金為天墉城面方千里城上安金臺五所玉樓十二其北戶山承淵山竝其支輔又有墉城金臺玉樓相似如一流精之闕

光碧之堂瓊華之室紫翠丹房景雲燭日朱霞九光西
王母之所治上通璇璣元氣流布五常玉衡普引九天
之澳灌萬仙之宗根天地之紐萬度之柄矣上生金銀
之樹瓊柯丹寶之林垂蘇瑚以為枝結玉精以為實其
樹悉刻題三十六國音諸天玉文上棲紫鸞鳳鸞白雀
朱鶚鷗鷯靈鵠赤鳥青鵠下則飛禽遊獸與崑崙同生初
無歟耗但玄文寶經隱書古字有千二百億萬言在玄
圃之上積石之陰仙人有九萬人皆傳散於靈山學者

恒誦諸天內音外國三十六音地下九壘之音九年仙人自當降送靈山之神奇三十六年得乘五色雲輿上登崑崙之山也



雲笈七籤卷二十二